

*ASOMA ta protestando!***MEP KIER TRECE DOBLE-R PA EVENTO**

ORANJESTAD (AAN): For di luna pasa caba, e Asociacion ASOMA a dirigi carta pa tur Partido Politico na Aruba, cu e suplica pa cada directiva di e partidonan ora cu nan ta tene actividad, pa nan haci uso di bandanan local y no bandanan stranhero.

E decision aki a ser tuma durante un reunion dia 25 di November caminda unanimamente e Directiva di Asociacion di Musiconan Arubano (ASOMA) a duna nan aprobacion pa e carta aki worde manda pa e Partidonan.

Asina pues dia 26 di November 1992 ASOMA a dirigi e carta pa e Partidonan Politico.

Carta a bay tambe pa Partido MEP. E carta ta encera entre otro cu e Directiva ta haci un suplica na nan pa duna e participacion musical cu ta worde rekeri na e bandanan local envez di e bandanan stranhero.

"E pago cu ta worde haci na e bandanan local pa nan participacion na e actividadnan organisa pa e Partidonan Politico, lo yuda cubri gastonan cu e bandanan local tin, e.o. cu produccion di nan disconan," na opinion di ASOMA.

Cu esaki nan ta convenci cu e Politiconan lo duna asina un estimulo y alavez un reconocimiento na e musiconan local.

DOBLE R

Cu gran asombro, ASOMA a tende un promocion politico di MEP na un emisora local, caminda nan ta indica cu Diabierna awor nan lo tin un evento social na San Nicolas caminda lo ta presente algun banda musical y tambe Doble R di Curaçao.

Esaki naturalmente a pone Directiva di ASOMA actua inmediatamente. Nan a tuma contacto cu e miembronan, y un di e promenan cu a haya contacto cu ne tabata Didi Wernet, kende a duna su OK pa ASOMA bay prensa y publica loke MEP ta haciendo cu musiconan local.

"Asoma den e carta di 26 di November pa tur partido politico claramente a indica un suplica pa durante campaña pa no duna bandanan stranhero e oportunidad pa actua durante esaki. E ta pa duna nos bandanan local e privilegio ey, cual sigur ta un estimulo y reconocimiento di

Na:
Directiva di
Movimiento Electoral di Pueblo (M.E.P.)
Presente.

Aruba, 26 nov. 1992

Pa medio di es carta aki, directiva di Asosacion Di Musiconan Arubano (A.S.O.M.A.), ta acerca Boso directiva cu lo siguiente.

- teniendo cuenta cu e campaña electoral cu ta andando.
- teniendo cuenta cu e actividadnan pa recauda fondo y social cu ta wordo organisa pa Boso partido.
- teniendo cuenta cu diferente di e actividadnan ey, ta encera acompaña musical.

Directiva di A.S.O.M.A. ta haci un apelacion na boso directiva, pa duna e participacion musical cu ta wordo requeri, na nos bandanan local envez di bandanan extranhero.

E pago cu ta wordo haci na e bandanan local, pa nan participacion na e actividadnan organisa pa Boso partido, lo yuda cubri gastonan cu e bandanan local tin, e.o. cu produccion di nan disconan.

Directiva di A.S.O.M.A. ta convenci cu Boso contribucion na esaki lo ta un estimulo y alavez un reconocimiento na nos musiconan local.

Gradiciendo Boso directiva pa cu Boso contribucion na esaki, Directiva di A.S.O.M.A. ta termina es carta aki deseando Boso Partido Politico tur clase di exito.

Atentamente.

JEANDOR J.O.
Presidente.

DE FREITAS M.
Secretario.

talento local," e presidente di ASOMA a declara na DIARIO.

Awor nan ta mira cu Partido MEP no ta duna oido na e carta (cual a ser entrega na Felix Flanegin) Pa tal motibo nan ta manda un suplica fuerte na MEP y otro partidonan pa nan honra e carta aki.

DIARIO tin informacion cu toch tin algun Partido Politico cu tin planea pa trece bandanan di exterior pa actua den nan campaña.

CHAYENNE NO DOBLE R SI

Un biaha mas por mira con MEP ta haci uso di poder, semper y cuando esaki ta na su favor. Por corda con Gobierno a haci su curpa bira manera "The Plastic Man" pa asina stroba tur e intentonan pa laga Chayenne dreña Aruba. Tur hende sa di e publicidad negativo cu Aruba a haya di esaki despues ora cu e artista a relata loke a pasa atravez di Sabado Sensacional. Gobierno a tapa oreo y a keda para firme cu Chayenne no ta dreña, pasobra e ta saca mucho divisas di Aruba.

Pero awor, cu MEP mester busca manera pa haya su votonan, ta core busca Doble R di exterior. Awor si esaki por, y ni maske cu ASOMA ta haciendo suplica pa Partidonan Politico honra Ambi-

anonan prome, toch esaki parce di no tin importancia cerca esnan di MEP.

ASOMA ta sumamente disgusta cu e acontecimiento aki, y ta bolbe manda su mensahe: "Cualquier partido, sin excepcion, cu trece un banda di exterior durante campaña, siguramente lo bay conta cu critica fuerte!"